

ARLeF: Alfabet furlan e Mape dal Friûl par dutis lis scuelis primariis

E pe scuele de infanzie un poster cu lis ativitâts di ogni dì.
A son stâts dâts fûr a passe 1850 classis
par supuartâ l'insegnament de lenghe furlane

Intai dîs passâts i gnûfs posters educatîfs de ARLeF – Agenzie regionâl pe lenghe furlane a son stâts dâts fûr a passe 600 classis de scuele de infanzie e a 1.250 classis de scuele primarie.

Lis scuelis de infanzie a àn vût il poster "*La mê zornade*", che al jude i fruts a tignî a ments lis ativitâts di ogni dì e i moments impuartants de zornade tant che fâ di gulizion, gustâ, lavâsi i dincj e tant altri.

L'"*Alfabet de lenghe furlane*", invezit, al vignarà doprât tes aulis des classis 1^e e 2^e de scuele primarie e al judarà i piçui a imparâ a lei e a scrivi l'alfabet e i digrams de lenghe furlane.

Chei un pôc plui grancj, infin, che a frequentin za la 3^e, 4^e e 5^e de scuele primarie, a podaran zovâsi dal poster "*Friûl*", cuntune mape par imparâ i confins dal Friûl, trop che al è grant, lis citâts plui impuartantis e i cinc sîts dal Patrimoni mondiâl UNESCO.

In maniere simboliche, il president de ARLeF, Eros Cisilino, al à consegnât di persone i materiâi al Istitût Comprensîf di Tresesin. A jerin presints i arlêfs de prime e de cuinte de scuele primarie, adun cu lis lôr insegnantis di lenghe furlane Sonia Cargnelutti e Anna Zossi.

I posters educatîfs a son un supuart util pai docents, par insegnâ la lenghe furlane in maniere simpri plui vivarose, stiçant la curiositât e la partecipazion dai fruts. Al è propit par chest che a son stadis fatis trê versions diferentis, daûr dal cicli scolastic di riferiment.

Ma no je finide, parcè che i posters, in formât A3, si puedin discjamâ in maniere gratuite ancje tal sît www.arlef.it. Tal portâl de Agenzie a son a disposizion ancje altris materiâi pai insegnants e pes fameis, come par esempi schedis didatichis e i files audio dal "*Alfabet de lenghe furlane*", par scoltâ la pronunzie di ogni letare e des peraulis che a tachin cun chel sun. Cun di plui, si pues ancje discjamâ il pdf cu lis singulis letaris: il frut al podarà taiâls fûr, metilis dongje e creâ gnovis peraulis, sot de vuide dal insegnant o dai gjenitôrs

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<

Chescj posters a insiorin un progjet plui ampli, stant che za de fin dal 2022 la Agenzie e je daûr a dâ fûr in maniere gratuite “Anìn!”, il Manuâl pal insegnament de lenghe furlane intes scuelis primariis. Chest, di fat, al è il prin manuâl pensât par compagnâ i arlêfs a scuvierzi la lenghe furlane, lis particularitâts dal teritori dal Friûl, de sô storie e de sô culture. Al è un progjet promovût de ARLeF in atuazion dal Plan gjenerâl di politiche linguistiche pe lenghe furlane 2021-2025 de Regjon Autonome Friûl-Vignesie Julie. Al ven dât a ducj i arlêfs des scuelis primariis che i lôr gjenitôrs a àn aderît al insegnament de lenghe furlane tant che previodût de leç 482/99 e de leç regjonâl 29/2007.

Par cualsisei informazion, i docents a puedin contatâ il Sportel Regjonâl pe Lenghe Furlane a chescj riferiments: tel. 0432 1743400, e-mail scuele@sportelfurlan.eu.

Udin, ai 24 di Avrîl dal 2024

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche / e-mail: arlef@caltpr.it

Eleonora Cuberli - mob. + 39 340 3546890 / Adriana Cruciatti - mob. +39 335 6853775

<<<<<<<<<<<